

**Siku Blocki malillugu nunatsinni sanaartornermut atugassatut pilersitsisoqarsinnaanera, taamaaliornikkut nunatsinni illuliornerup aningaasatigut imminut nammassinnaasumik ingerlanissaanut ilapittuutinngorlugu periarfissiuunnissaa pillugu Naalakkersuisut UKA2022-mi nassuiaammik saqqummiusseqqullugit peqquneqarnissaannik Inatsisartut aalajangiiffigisassaattut siunnersuut**

(Inatsisartuni ilaasortaq Mariane Paviasen, Inuit Ataqatigiit)

**Akissuteqaat**

(Ineqarnermut, Attaveqaasersuutitut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

**Siullermeerneqarnera**

Naalakkersuisuniit siunnersuuteqartoq anguniagaqarnerani isumaqatigilluinnarparput, taamaattumik qutsavigaarput. Sanaartornerup inuiaqatigiinnut pitsaasunik, aningaasaqarnikkut angusaqarfiulluurtumik imminullu akilersinnaasumik sunniuteqarnissaa Naalakkersuisut isiginiarpaat, pingaartumik sanaartornermi najukkami tunngavissaqarluurtumik tunisassiornissaaq annerusumik annikinnerusumilluunniit tunngavigineqartussaattillugu.

Naalakkersuisuniit Sikublock-ip eqqumaffigineqartuarnera paasilluarneqarpoq akuersaarneqarlunilu.

Cementimik ujaqqiap Sikublock-ip isumassarsiarineqarnerani tunngavisoq ersarippoq. Ilaatigut aningaasat ikinnerusut nunatsinniit annissorneqalissapput, ilaatigut qisuit tikisinneqartartut atugaangaatsiartut sanaartornermi atortunik atasinnaanerusunik aserfallatsaaliugassaangitsunillu taarsersorneqarpata aningaasat ikinnerusut aserfallatsaaliuinnermut atorneqalissapput. Tassalu sanaartornermut atortut, najukkani atortussiassanik, nunatsinni piiarneqartunik pisariitsumik sanaat.

Inuiaqatigiinni imminut pilersornerup piujuartitsinerullu annertusinissaasa tungaannut ineriartortitsisoqarnera tamakkerlugu Naalakkersuisunit iluarisimaarneqarpoq. Tamanna siunissami Naalakkersuisunit annertunerusumik sulissutigineqarusuppoq.

Sikublock nassaarineqartoq qularnaatsumik iluaqutissarpassuaqarpoq, soorlu pisariitsumik tunisassiarineqarsinnaavoq, sanaartukkami naammassisami sivisuumik atasinnaavoq, illup iluanut silaannarissuutitsisarpoq aammalu nukissamik atuinermik annikillisitsisarlungi. Kisianni aamma aalajangersimasunik arlalinnik unammilligassartaqarpoq, Sikublock atorlugu sanaartortoqalernissaata ammaanneqarnissaa sioqqullugu naammassineqartariaqartunik. Iisimaneqarpoq, qarmaaneq taamaallaat sila kiatsillugu panertillugulu pisinnaammat.

Taamaattumik Sikublock atorlugu sanaartorneq tunngaviumik ukiumi qaammatialuinnarni ingerlanneqarsinnaavoq.

Sanaartornermut atortunik tunisassiornermi unammilligassat aapparaat, sanaartornermut inatsit naapertorlugu tunisassiat nakkutilleeriaatsimut akuerisamut ilaasussaammata aammalu akuinut nassuiaatitaqartussaallutik. Maannamut Sikublock-ip sanaartorneqarneranik ujarak cementiusoq piunasaqaatinut taakkununga naapertuunnersoq takutinneqarsimanngilaq. Tunisassiaq nakkutigineqarsimatinnagu akuinullu nassuiaasiortoqarsimatinnagu illussanik titartaasartut ingeniørillu pilersaarusiortut sanatitsisumut, Sikublock atorlugu sanaartorusuttumut siunnersortitut akisussaaffimmik nalinginnaasumik tiguserusussinnaanisaat naatsorsuutigineqarsinnaanngilaq.

Nassuiaat “Kalaallit sanaartornermut atortussiat” aamma nalunaarusiaq “Kalaallit Nunaanni illut silataanni iikkanik qarmakkanik misissuineq” 2019-imi upernaakkut ataatsimiinnermi Inatsisartunut agguanneqarpoq.

Nassuiaammi, taamatullu nalunaarusiami uppersarneqarpoq, Sikublock atorlugu sanaartornermi unammilligassaat taaneqareersut saniatigut aamma allanik arlalinnik unammilligassaartoqartoq.

Tamatuma saniatigut nassuiaammi ilaatigut illuliortiternermik sanaartornermillu suliaqartut siuttuunissaat, aammalu sanaartornerup iluani teknologiimik ineriartortitseqataanissaat pingaaruteqartoq erseqqissaatigineqarpoq. Pisortanit sinaakkusiussat aalajangersarneqartussaapput, aammalu inuussutissarsiortut namminersortut sanaartornermut atortunik ineriartortitsisussaapput sanaartortussaallutillu.

Taamatut ineriartortoqarnera takusinnaareerparput, tassami entreprenørnit arlallit namminneerlutik najukkani betoninik ikkussugassanik – iigassanik natissanillu – tunisassiornissamut atortulersorsimapput. Matumani atortut ikkussugassat pisariitsut, sulisunit ilinniarsimannigitsunit sanaartorneqarsinnaasut pineqarput. Taamaalilluni ikkussugassanik tunisassiornerit najukkani sulisut piginnaasaannik ineriartortitsinermit tapertarinqarput, taamaalillunilu piffissami sanaartorluarfiusumi avataaniit sulisussanik pisariaqartitsineq annikillisinneqarluni. Betonit ikkussugassat pisortat namminersortullu illuliortiternerini atornerqarput, aammalu taamatut sanariaaseqarnerup kingunerisaanik sanaartornerit piffissanut siaruartiterluarneqarput, tamatumalu nassatarisaanik sanaartugassanik pilersaarusiornissamut atugassarititaasut pitsaanerpaatinneqarlutik.

Ataatsimut isigalugu suliniutit taamaattut sanaartornermik ingerlallualersitsissapput – sanaartornerup nalaani sullivinni avatangiisinut iluaqutaaginnannigitsumik, aammali sanaartukkap naammassinermit atasinnaassusianut pitsaassusianullu, naggataagullu najukkani inuiaqatigiinni avatangiisinut iluaqutaasumik. Nunatsinni sanaartortut nammineersinnaanerat Naalakkersuisunit nuannaarutigineqarpoq!

Nassuiaammi “Kalaallit sanaartornermut atortussiaat” siunnersuutigineqarpoq, pitsaassutsimut, atasinnaassutsimut, meqqilersuisarnermut allarpassuarnullu piumasaaqatinut, Namminersorlutik Oqartussat sanaartugaataannut ilaatitsisoqassappat sanaartornermut atortuni naammassineqartussanut innersuusiortoqassasoq.

Naalackersuisut siunnersuut malissamaarpaat, aammalu misissuineramik, nunatsinni tunisassiornermi misilittagaasunik nalunaarsuiffiusumik aallartitsissamaarput, misilittakkallu taaku tunngavigalugit assersuutigalugu sanaartukkap atasinnaassusianut qajannaassusianullu, aningaasaqarnermut aamma sanaartornermi atortunik imminut pilersornerup annertussusianut, inuit eqqarsaatigineqarnerinut, pinngortitap kulturillu eqqarsaatigineqarnerinut, silap pissusianut sunniutissat eqqarsaatigineqarnerinut, qanitani avatangiisinut nunarsuarmilu avatangiisinut piumasaaqatinik aalajangersaaniarlutik.

Siunissami sanaartukkat atasinnaasutut isigineqarsinnaalissappata, naatsorsuutigisat piumasaaqatillu suunerinik illuliortiternermik sanaartornermillu suliaqartunut paasiuminarsaanissaq siunertarineqarpoq.

Tamanna tunngavigalugu Naalackersuisut allannguutissatut siunnersuummik imaattumik saqqummiussipput:

**Najukkani sanaartornermut atortunik tunisassiornissamut piumasaaqatinik, UKA2022-mi saqqummiunneqartussanik suliaqarnissamut Naalackersuisut peqquneqarnissaannik Inatsisartuni aalajangiiffigisassatut siunnersuut. Piumasaaqatit Inatsisartunut agguanneqassapput, kiisalu tamanut ammasumik saqqummiunneqassapput aammalu illuliortiternermi sanaartornermilu suliaqartunut attuumassutilinnut, kommuninut aamma ilinniarfinnut attuumassutilinnut agguanneqassallutik.**

Taamaalillunga aalajangiiffigisassatut siunnersuut Inatsisartuni kajumittumik suliaassanngorlugu tunniuppara.